

Date – 29/06/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. SIR kal mekah Mizoramah mitthi tawh leh chhan hrang hrang vanga hming paih a nih hnu-ah vote nei mi nuai 8, sing 2, sang 8 leh 877 an awm.
2. IMD, Aizawl Director Pu Sudheer Kumar Dwivedi hnen atanga thu dawn danin, tukar chhoah hian Mizoram hmun hrang hrangah ruah a sur leh rin a ni.
3. Prime Minister Narendra Modia chuan Indian Ocean-ah India chuan hmathlir tha tak a neih thu a sawi
4. Vice President C P Radhakrishnan chaun ramchhung mipuite chu hriselna lama tan la tur leh Nasha Mukta. Bharat hnuaiah ruihhlo laka fihlim turin a ngen



EF DIGITISATION

Electoral roll Special Intensive Revision (SIR) kal mekah Mizoramah mitthi tawh leh chhan hrang hrang vanga hming paih a nih hnu-ah vote nei mi nuai 8, sing 2, sang 8 leh 877 an awm.

SIR kal mek a Booth Level Officer (BLO)-te’n enrolment form sem leh lakkhawm hun atana Election Commission of India (ECI)-in hun a bithliah chu a tawp tawh a. Puan tawh angin enumeration form digitise hi Ningani khan Mizoramah chuan zawhfel a ni tawh a, nimin khan engkim chinfel hman a ni. Nikum electoral roll-ah khan vote nei mi nuai 8, sing7, sang 5, leh 68 an awm a. Tuna thliar fel a nih takah hian vote nei mi nuai 8, sing 2, sang 8 leh 877 an awm ta a. Hei hi a chhan hrang hrang a awm a. Nikum electoral roll a chuang thi tawh mi 21,290 an awm a, mi 8,352 chu an awmna hmuhchhuah zawh loh leh biak pawh theih loh an awm a, mi 13,992 zet chu insawn hlen an ni a, mi 2,245 chu ziahluh sa tawh an ni. Hei bakah hian mi 312 chu sakhaw rinna avanga electoral roll-a inziaklut duh lo an awm bawka. Kum 2025 electoral roll atanga chhut chuan tuna electoral roll a hming chuang zat hi za zela 94 point 72 a ni a, a tlem takna hi za zela 5 point 28.

SIR kal mekah hian Election Commission chuan May ni 30 leh June ni 28 inkar chhung hi enumeration form chinfel hun atan a ruat a. BLO-te chu an bial chhunga in tin vawi 3 tal tlawh chhuak a, form sem leh lakkhawm hna thawk turin a bituk a. Mizoram chuan hun tiam hma a zo hmanin tuna SIR thawh thumna a state 16 leh UT

3 zingah a zo hmasa ber a ni. Draft electoral roll hi Inrinni (July ni 4) khian tihchhuah a ni ang a. July ni 4 leh August ni 4 inkarah sawisel tur emaw inthun duh nei emaw tan hun hawn niin he'ngte hi September ni 2 thleng chinfelna hun siam a ni a. SIR hnuai a electoral roll tak tak chu September ni 6-ah tihchhuah a ni dawn a ni.

<><><>

PEACE DAY

Kum danga an tih thin dan angin MZP chuan Mizoram Remna Ni lawmna a buatsaih leh dawn.

MZP President Dr. C. Lalremruata'n Akashvani News Aizawl a hrilh danin naktuk Thawhlehi (June ni 30) hian LPS Arena-ah Remna Ni puala inkhawm buatsaih a ni dawn a. Chawhma dar 11 a tan tur he hunah hian Home Minister Pu K. Sapdanga chu khuallian a ni ang. Inkhawm hi MZP Vice President Pu Sanghmingthanga'n a kaihruai ang a, khuallian Pu K. Sapdanga bakah MZP President Pu C. Lalremruata te'n thu an sawi ang a. Synod Moderator Rev. John Raldosanga'n hunserh a hmang ang. Kuminah hian remna leh muanna atana thawhhlawk Rev. Dr. CL Hminga chu chawimawina hlan a ni dawn a. Khuallian hian Remna Ni puala Souvenir siam chu a tlangzarh dawn bawk a ni.

He tih lai hian Zoram Research Foundation huaihawtin vawiin chawhnu dar 2 hian State Planning Board Committee Room-ah Remna Ni puala hun hman thawh khatna chu hman a ni dawn a. Remna Ni kum 40 tlinna pualin '40 Years Of Harmony: Legislative Dialogue on Peace Building' tih thupui hman a ni ang a. A tuk, Remna Ni takah BSI Hall, Bible House-ah 'From the Frontlines of '66 to 40 Years of Peace' tih thupui hmangin inkhawm buatsaih leh a ni ang a. Chawhma dar 10 leh a chanve a tan tur he inkhawmah hian larsap General VK Singh chu khuallian a ni ang a. Chanchinbumi hlun tak Nitin Gokhale kawmna hun leh rambuai laia chanchinthar lam lo khawih thintu – MP hlui, Doordarshan Director General hlui ni bawk Pu C. Lalrosanga te, DIPR Director hlui Pu LR Sailo te, All India Radio chanchinthar chhiar thintu Pu Lalramliani Hnamte leh Mizo Aw Editor hlui Pu DR Zirliana te kawmna hun hman a ni bawk ang. He'ng inkhawmte hi Zoram Research Foundation huaihawt a ni a, a buaipuitu dangte chu India Peace Centre leh Aijal Club te an ni.

<><><>

HPO, ZORO MEET

Mizoram dep Myanmar Chin state thlang lam tualchhung sorkar thuneitu Hualngo People's Organisation (HPO) hruaitute chuan tun hnai khan Aizawl-ah Zo Reunification Organisation (ZORO) hruaitute an rawn kawm.

HPO palaite hi an thupuangtu Pu Jacob V. Zawma'n a rawn ho a. Aizawla palai an rawn intirh chhan sawifiahin tun hnai-ah Myanmar sipai sorkar chuan Chin state-ah sipai tam zawk rawn tirin thlang lam, Mizoram dep lam an rawn nawr thla zel dawn ni a a lan thu an sawi a. A bikin Zokhawthar ep mai a awm, Khawmawi, Rihkhawdar leh Haimual kuate chu nasa taka rawn beih an tum dawn ni a hria-in mipui-in ei leh bar bakah damdawi lama harsatna an tawh lohna tura tanpui tura lo inring lawk turin an rawn ngen a. Tun hnai-ah Myanmar sipaite hian Falam,

Tonzang leh Khampat khuate an lalet leh tawh a, Kanan khua pawh nasa taka indo thlawhna hmanga bomb thlakin sipai pawh an rawn tirh luh belh zel a ni.

ZORO hruaitute hian HPO palaite hi Health Minister Pi Lalrinpuui pawh an hmuhpui niin an sawi a. Damdawi leh damdawi lama inenkawlna an mamawh phawt chuan theihtawp lo chhuahpui a tum thu a lo hrilh niin an sawi bawk a ni.



ILP RAID

Sub Hqrs YMA Saitual chuan kumina NE Khawdungsei a inkhawmpui rorel bawhzuiin tun hnai khan an huam chhunga YMA Branch hrang hrangah Inner Line Permit (ILP) endik runpui an kalpui a, ILP nung tawh lo mi 20 an hmuh chhuak.

Sub Hqrs YMA Saitual chuan Saitual huamchhunga hnamdang hnathawk leh sumdawng 66 te ILP an enfiah a, chung zingah chuan ILP nung tawh lo mi 20 hmuchhuakin, Sponsor-tute nen an inbiak hnuah an zing a 4 te chu an ram lamah hawtir an ni a, midang 16 te chu hun tiam chhunga an ILP tifel tura hriattir an ni. Sub Hqrs YMA Saitual hruaitute chuan ILP fel lo chung Mizorama hnam dang hnathawk awm leh thin leh Sairang Rel chawlhmun atanga lo lut zingah ILP nei lo tam tak an awm nia lang chu an ngaimawh thu sawiin, thuneituten tun aiin enzui uluk se an duh tih an sawi a. Hei bakah hian Sub Hqrs YMA Saitual hruaitute chuan hnathawk tura hnamdang sponsor tute pawh, an sponsor te chu an permit neihna hmunah chauh hna thawk tura hrilh tur leh hmun danga an kal darh loh na’n enzui thin turin an chah bawk a ni.



12 YEARS OF NDA

Sorkar laipuiin India khua leh tui kum 70 chin chunglamin a thlawna damdawi-ina inenkawl theihna a siam, Ayushman Bharat - Pradhan Mantri Jan Arogya Yojana (AB-PMJAY) chu Mizoramah mi sing 3, sang 3 chuanguin an hmang tawh.

Aksahvani Aizawl-in a kawmnaah, BJP Mizoram IT & Media Cell Prabhari Pi K. Vanlalruati chuan AB-PMJAY chu India khua leh tui kum 70 chin chunglam tute pawhin an hman theih a ni tih sawiin, Mizoram chhunga sorkar damdawi in leh state pawna Mizoram sorkar empanelled damdawi in zawng zawngah te a thlawna an inenkawl theihna a ni a ti a. AB-PMJAY hian MUHCS a huam tel vek avangin AB-PMJAY card nei te tan a hranpa in MUHCS a inziah luh a ngai lova, AB-PMJAY-a inziak lut tur hian pawisa chawi a ngai ve lova, Health & Family Welfare department pisa bakah BJP Mizoram office leh common service centre (CSC)-ah te a inziah luh theih tih a sawi a. AB-PMJAY hi Mizoram mipuiten an hre tawh lo hle nia an hriat thu sawiin, tun dinhmunah Mizoramah mi sing 3, sang 3 chuanguin an hmang tawh nia a hriat thu a sawi bawk.

BJP Mizoram State Media Convener, Pu Johny Lalthanpuia chuan AB-PMJAY hnuaiah hian kum 1-ah cheng nuai 5 man thleng a thlawnin inenkawlna a dawn theih ta niin a sawi a. Ama pa ngei pawh Civil Hospital-a enkawl a nih laiin AB-PMJAY hi an hmang tangkai hle tih sawiin, ni khata hman theih zat bituk pawh awm lovin a thlawnin enkawlna tha tak an dawng a, lawmawm a tih thu a sawi a ni.



WEATHER

IMD, Aizawl Director Pu Sudheer Kumar Dwivedi hnen atanga thu dawn danin, tukar chhoah hian Mizoram hmun hrang hrangah ruah a sur leh rin a ni.

Akashvani News Aizawl zawhna chhangin Pu Sudheer Kumar Dwivedi chuan, Mizoram hmun hrang hrangah ruah tlem a zawng a sur leh dawn a. A bik takin Kolasib, Aizawl, Mamit, Serchhip, Lunglei, Lawngtlai, Siaha, leh Champhai-ah te ruah a sur tam deuh rinawm tih a sawi.

IMD thuneitu te chuan fur lai a nih avangin thlipui leh ruahpui thawk thei reng a ni tih an sawi a, heng bakah hian ruah a sur rei tawh avangn hmun hrang hrangah lei a min thut thei bawk. Chuvangin Disaster Management Department kaihhruaina te ngaichang turin mipui an chah a ni.

Fur lai hian mipui te fimkhur a ngai nasa zual a, ruah sur leh thli tleh laiin thing hnuaiah tawm loh tur a ni a, chenna in tha tawk lo deuh te chu a theih anga thuam that tur a ni. Naupang leh kum upa lam te chu fimkhur zual tura chah an ni bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PM

Prime Minister Narendra Modia chuan Indian Ocean-ah India chuan hmathlir tha tak a neih thu a sawi. Nimina Seychelles President Patrick Herminie nen Victoria-a an inkawmnaah he thu hi sawiin Indian Ocean-ah venhimna tha tak nena sumdawna chetvel chu a hmathlir anih thu sawiin ram leh ramte inzahtawna thawhhona tha tak neih a ni ang a ti a. India chuan Indian Ocean chu sum tam tak thawhchhuahna hmunpuia siam turin hmathlir a nei a ti bawk.

Pu Modia chuan President Herminie nen an inkawm dan chungchangah thuchhuah siamin ram pahnih inkara thawhdunnate zau taka an sawidun thu a sawi a. Hei bakah hian ram pahnihten agriculture, finance, space leh hriselna lamah thawhdunna tur inremna an siam a ti a. UPI chungchanga inremna an ziak thei chu lawmawm atih thu a saiw bawk a ni.

Prime Minister Modia hi Secheylles chawimawina sang ber Guardian of the Blue Horizon hlan a ni.

<><><>

VP

Vice President C P Radhakrishnan chaun ramchhung mipuite chu hriselna lama tan la tur leh Nasha Mukta Bharat hnuaiah ruihhlo laka fihlim turin a ngen. Bengaluru-a Rajiv Gandhi University of Health Sciences din cham lawmna leh Nasha Mukta Bharat programm hmannaah he thu hi sawiin Pu Radhakrishnan chuan mipuite chu inhrilhriatna tha pek an ngai tih a sawi a. Thawhhona tha leh inpumkhatna nen ram hrisel leh chak din turin tan lak a tul thu a sawi bawka a ni,.

<><><>

WORLD CUP

FIFA World Cup 2026 chu nizan zanlai atang khan round of 32 khelh tan a ni a, knockout round match hmasa berah inelna thlengtu ram pathum zinga pakhat Canada chuan goal khat faiin South Africa an hneh a, last 16 an lut.

Zanin dar 10:30 hian inelna chhonzawm leh tur niin world champion vawi nga ni tawh Brazil leh Asia ram team tha Japan te an inkhel ang, zing lam dar 2:00-ah Germany leh Paraguay te an inkhel dawn bawka a ni.

<><><>